



Relikyas ni San Antonio de Padua

Adunay tulo ka klase sa mga relikyas sa mga Santos.

First-Class Relics: Mao kini ang mga parti sa lawas sa Santo sama sa buhok, ngipon, bukog ug uban pa.

Second-Class Relics: Mao kini ang mga butang nga gipanag-iya o gigamit sa mga Santos sa buhi pa sila. Sama sa krusipihon, libro, rosaryohan, higdaanan, bisti o sanina ug uban pa.

Third-Class Relics: Bisan unsa nga butang nga gipatapot o gipahid ngadto sa first-class o second-class relic.

Nakadawat ang atong kapilya ug mga relikyas ni San Antonio gikan mismo sa Basilica ni San Antonio didto sa Padua, Italia. Mga Second-Class Relics kining mga relikyas nga libreng gihatag sa mga nagdumala sa lawas ug mga gamit ni San Antonio. Ang mga pulong nga **"Ex Indumentis"** ang nakabutang sa mga relikyas nga nagpasabot **"Gikan sa Bisti"** ni San Antonio. Mangita pa ta ug sudlanan para niining mga presyoso nga relikyas sa atong mahal nga patron.

Unsa may mga merito niining mga relikyas sa Santo? Sa dugay na nga mga katuigan, ang Ginoo naghimo ug mga milagro diha sa relikyas sa mga Santos. Kasagaran mao ang pagkaayo sa mga masakiton.

Sa Balaang Kasulatan, adunay istorya diha sa Libro sa 2 Hari 13:20-21 nga samtang ang patay nga lawas sa usa ka tawo gipatapot ngadto sa mga bukog ni Propeta Elisha, nabuhi ug kalit ang minatay.

Ang babaye naayo sa iyang sakit pinaagi lamang sa iyang paghikap sa bisti sa atong Ginoo. (*Mateo 9:20-22*)

Dakong katingalahan ang mga milagro nga gihimo sa mga Apostoles kay bisan ang mga tawo naglina sa kadalanan uban ang mga masakiton aron malabyan lang sa anino ni San Pedro ug maayo sa ilang mga sakit. (*Buhat 5:12-15*)

Ang mga panyo nga gipahid sa lawas ni San Pablo maoy gigamit aron sa pagpanambal sa mga tawo ug pagpagula sa mga yawa. (*Buhat 19:11-12*)

Pero atong likayan nga mahisalaag kita ug masayop sa paggamit sa mga relikyas. Ang mga relikyas dili pwede nga ibaligya ug dili gayud mapalit kay sagrado kini. Dili usab pwede nga simbahon ang relikyas sama sa atong pagsimba sa Ginoo. Ang mga relikyas dili kana Ginoo. Ang relikyas maoy gihimong instrumento sa Ginoo sa paghatag sa iyang mga grasya dinhi kanato. Ang tinubdan sa mga grasya ang Ginoo mismo. Ang mga milagro nga moguwa diha sa relikyas, dili gayud gikan sa maong relikyas, gikan gayud sa Ginoo. Walay gahum ang mga relikyas. Apan ang kamatuoran nga gigamit sa Ginoo ang relikyas sa mga Santos sa pagpadayag sa iyang mga milagro, nagpasabot kana nga gusto sa Ginoo nga mopaduol kita sa iyang mga Santo. Gusto sa Ginoo nga mosangpit kita ug mangayo sa panabang sa iyang mga Santo. Gusto sa Ginoo nga madebosyon kita ngadto ni San Antonio de Padua.

Hunyo 13

Ang atong gisaulog nga piyesta ni San Antonio de Padua diha sa petsa Hunyo 13 mao ang ang adlaw sa iyang kamatayon, ang adlaw sa iyang pagsulod sa Gingharian sa Dios sa langit. Tanang Santos nga atong gisaulog sa mga kapistahan mao ang adlaw sa ilang kamatayon ug dili sa ilang adlaw nga natawhan. Kay gipakatawo man sila ug kita nga adunay sala o sala nga panulondon. Gawas sa atong Ginoo, si Birhen Maria ug si San Juan Bautista lamang ang atong gisaulog diha sa ilang adlaw nga natawhan. Nganu man? Kay nagtoo man kita nga gipanamkon ug gipanganak si Maria nga walay sala ug gipanganak si San Juan nga limpyo sa sala. Ang adlaw sa kamatayon sa mga Santos mao ang adlaw sa ilang pagkatawo ngadto sa Gingharian sa Langit. Atong gisaulog ang ilang pagsulod sa langit.



Namatay si San Antonio niadtong Hunyo 13, 1231. Karung tuiga mao ang ika-786 nga anibersaryo sa pagkamatay ni San Antonio didto sa Padua, Italia. Ang dila lamang niya ang wala madugta o wala madunot. Ang iyang mga bukog ug mga sanina atua gipreserbar sa iyang Basilica sa Padua, Italia.

Fatima ug Portugal

Si San Antonio gitawag nato ug San Antonio de Padua kay didto man siya nagdugay ug namatay sa Padua. Pero taga Portugal gayud siya. Didto sa Portugal siya gipakatawo.

Karung Hunyo 13, atong saulogon ang piyesta sa atong Patron nga taga Portugal. Ug sa maong adlaw gihapon, atong saulogon ang Aparisyon nga nahitabo didto sa Portugal. Niadtong Hunyo 13, 1917, nagpakita si Birhen Maria sa ikaduhang higayon ngadto sa tulo ka bata didto sa Fatima, Portugal. Ang unang higayon sa iyang pagpakita mao niadtong Mayo 13, 1917. Kada petsa 13 sa bulan gikan sa Mayo hangtud sa Oktubre siya nagpakita sa mga bata. Karung tuiga usab mao ang ika-100 nga anibersaryo niining pagpakita sa Mahal nga Birhen sa Fatima. Ang lugar nga Fatima, sakop kini sa nasud sa Portugal. Diin man gikan ang ngalan nga Fatima? Ang Fatima usa ka Muslim nga ngalan. Ang nagtukod sa relihiyon sa mga Muslim nga mao ang Islam mao si Muhamad. Ug kini si Muhamad adunay anak nga ginganlan niya ug Fatima. Ug matod pa ni Muhamad diha sa Koran nga sunod sa Bulahang Birhen Maria, ang iyang anak nga si Fatima mao ang pinakagwapa nga babaye sa kalibutan. Mao nga adunay mga Muslim nga babaye nga adunay pangalan nga Fatima. Niadtong unang panahon, ang mga Muslim nangagiw ug nipuyo sa Portugal sa pipila ka katuigan. Ug adunay usa ka gwapa nga babayeng Muslim ang pangalan mao si Fatima. Si Fatima nakapangasawa o nakaminyo ug usa ka adonahan nga Kristiyano. Si Fatima nga usa ka muslim, nakabig sa pagka Katoliko. Nahimong Kristiyano si Fatima. Gimahal siya pag-ayo sa iyang bana. Tungod sa dako nga gugma sa iyang adonahan nga bana ngadto kaniyaa, ginganlan niya ang iyang kayutaan ug "Fatima." Mao nga ang lugar karun gitawag ug Fatima. Ug ang lugar sa Fatima maoy gipili sa Bulahan nga Birhen Maria nga diin ipadayag niya ang iyang mensahe para sa tanang katawhan sa kalibutan.

Bag-ong Obispo

Si Padre Gerardo Zendejas gikonsagrahan sa pagka Obispo niadtong Mayo 11, 2017 didto sa Estados Unidos. Si Obispo Gerardo Zendejas maoy motabang sa pagpadayon sa misyon sa Simbahan sama sa ordinasyon sa mga pari, paghatag ug kupirma, pagkonsagrar ug bag-ong Obispo ug sa mga sagradong lana ug uban pa.



Magsugod ang Nobena ngadto ni San Antonio karung Hunyo 4 kutob Hunyo 12.

June 4 – June 12 Novena 5:30 PM

June 11, 2017 Sunday ~ 3:00 PM Misa Rezada
June 13, 2017 Tuesday ~ 4:30 PM Misa Cantada

Adunay prosesyon sa imahe ug relikyas ni San Antonio human sa Misa.

Contact: +63 910 710 6600

Email: romancatholicfaith@yahoo.com.ph

Website: saint-anthony-of-padua-catholic-chapel-hindang.webs.com